

LA PRISE  
DV COMTE  
DE LA SVSE,

faisant leuées en Dauphiné pour  
secourir Montauban.

*Mené & conduit à Grenoble par  
la Noblesse & Commune  
du pays.*

*Du 17 Octobre 1621*



A PARIS,  
Chez PIERRE ROCOLLET,  
au Palais.  
M. DC. XXI.  
*Avec Permission.*

27702 34

1871



LA PRISE  
DV COMTE DE  
LA SVZE, CHEF DES  
troupes Rebelles, leuées en  
Dauphiné, pour secourir  
Montauban.

*Mené & conduit à Grenoble,  
par la Noblesse & com-  
mune du pays.*



Comme des vents  
procedēt les ora-  
ges & le cour-  
roux de la mer,  
aussi des Grands  
arriue ordinairement le bransle  
& le mouuement des peuples:

car comme la testepouffe, & les membres suivent; aussi n'y a il mal aucun au Corps d'un Estat, que par la contagion & maladie des Chefs.

Les peuples qui se sont declarez Rebelles à sa Majesté, par la desobeïssance, ne se sont jamais portez à vne actiō si dénaturée, que sur l'assurāce qu'ils auoiēt en la protection de leurs Chefs, qui donnās toute liberté à leurs passiōs, ont fortifié la rebellion des places, tourné le trenchant & le fil de l'espee contre le respect de la Majesté Royale, contre l'autorité des loix & du biē public, & nous ont porté au malheur où nous nous voyons finalement reduits.

A cette sorte de resolution



ſeſt laiſſé emporter Monsieur le  
Comte de la Suſe, perſonnage,  
auquel la ſeule conſideration de  
ce que Dieu & la nature l'ont fait  
naître François & ſubject d'un  
grãd Roy, deuoit arreſter de pied  
ferme en ſon deuoir, & retenir  
ſur l'vnion & la cõcorde, & ſeſti-  
mer heureux de ce que Dieu euſt  
quelque jour employé ſon coura-  
ge en vne juſte occaſiõ, pour ren-  
dre ſon nom glorieux en la con-  
ſeruation de ſa patrie, & en la gloi-  
re de cette Couronne: & ce pen-  
dant lors que tant de braue No-  
bleſſe ſe monſtrant vrayemẽt No-  
bles & François, courent à cœurs  
bandez & à bras roidis aux plus il-  
luſtres occaſions de ſeruir le Roy;  
prendre l'eſſor de ſa paſſion, don-  
ner courſe à ſon appetit, & des ai-

les à son ambition , c'est deuenir  
 lasche en courage , & se rendre  
 odieux à la posterité.

Or pour ne rien entamer des  
 raisons qui ont meu le Comte de  
 la Suse de faire des leuees, ou pour  
 le moins courir aux étrangers pour  
 en tirer des forces: Il se sçait, com-  
 me ledit sieur Comte auroit souz  
 certaines Cómmissions pleinement  
 desaduouées de sa Majesté, couru  
 les païs de Liege, Alemagnes, Suif-  
 ses, Bernes & autres lieux Prote-  
 stans , pour faire quelques leuees  
 de gés de guerre en iceux, en des-  
 sein de les amener & faire entrer  
 en France, pour secourir les rebel-  
 les à sa Majesté , & se rendre dans  
 les mesmes vn des chefs du party,  
 & faire parler de luy entre les siés.  
 Ses desseins premiers n'ont pas

reüssi toutes fois, comme il se promettoit: dans le país de Liege encore que les Liegeois soient gens fort prôpts pour aller à la guerre, ils ne veulent neantmoins aucunement entendre à secourir des subiets rebelles à leur Roy.

Dans l'Allemaigne, combien que les Allemands marchent par tout avec de l'argent, le peu d'honneur & de profit qu'il y a d'entrer en vn Royaume au desadueu du Prince & contre son authorité, les retiendra tousiours dás les termes de l'honneur & du respect qu'ils portent à la Majesté de nos Roys; joinct que maintenant l'Allemaigne est trop diuisee & trop affairée pour pouuoir donner secours à autrui & à soy-mesme.

Dans les Cantons Suisses pro-

restans, l'estroicte alliance & confederation qui est entr'eux & les Roys de France, les rendra tousiours plus affectionnez a cultiuer l'amitié & faueur du Roy, qu'a entreprendre choses qui luy loier tant soit peu prejudiciables & desagreables.

Mesme iugement faut-il faire de la volonté des Bernois plus obligez au Roy qu'a nul autre Prince & Estat de la Chrestienté: aussi le Comte de la Suse ny autre quelz qu'ils soient n'ont iamais peu desbaucher les peuples estrangers pour venir en France, si ce n'est sous les commissions de sa Majesté pour la Conseruation du droit de laquelle ils sont tousiours prests d'armer & d'entrera sa premiere requeste.

N'ayant



N'ayant donc peu auancer  
aucune chose chez les Estran-  
gers, le Comte de la Susse passe  
par Geneue, & prend resolu-  
tion de retourner en France.

Il reuient par le Dauphiné  
assisté du Vicomte de Ma-  
chaut & de quelques Sei-  
gneurs & Gentils-hommes au  
nombre de quelque seize, les  
autres disent vingt cinq, pour  
assembler quelques troupes  
qui y estoient leuees pour le  
party rebelle & en prendre la  
conduitte: mais comme Dieu  
dispose de la proposition des  
factieux, il s'achemine du co-  
sté de Grenoble, & enuiron à  
deux lieuës proche de la ville,  
il se trouue avec sa Cōpagnie

le 17. d'Octob. dernier, surpris  
& attaqué de la nuit en vn  
petit village, fouruoyé de son  
chemin pamy les tenebres: il  
heurte à la porte d'une gran-  
ge où il voit de la lumiere, de-  
mande à parler à quelqu'un.  
Vn bon vieil homme sort, au-  
quel ledit sieur Comte de la  
Suse commande de le suivre  
& le guider. Le bon homme  
effrayé de voir ceste Compag-  
nie de Seigneurs & de Gen-  
tils hommes ainsi marcher de  
nuit à peur, & s'excuse de ne  
pouvoir marcher à cause de  
son aage & imbecilité de sa  
personne: & comme il se voit  
menacé & contrainct d'o-  
beyr, au lieu de luy il presente

son fils, qu'il leur donne pour guide : & comme il est prest à partir, il l'aduertit en secret de ne mener ceste troupe par les grands chemins, ains par voyes obliques & detournees, afin de leur faire prendre le plus long du lieu ou ils vouloiét aller, & auoir moyen cependant d'en donner aduis au Seigneur de la parroisse. Ce qu'il fait, car si tost qu'ils sont partis avec le guide, ce bon homme se doutant que c'estoient gens suspects, marchant ainsi de nuict & par troupe en vn pais incogneu, va en diligence trouuer son Seigneur le Gentil-homme du lieu, luy donne aduis de

cette Compagnie. Ce Gentil-  
homme desirieux d'apprendre  
quels ils estoient, faict aussi  
tost aduertir ses voisins les au-  
tres Gentils hommes du pais,  
qui tous montent prompte-  
ment à cheual & courent par  
routes les parroisses circon-  
uoinfines, faire sonner le toc-  
fain & assembler les Commu-  
nes.

Cependant le Comte de la  
Suse arrive avec les siens en un  
lieu ou la garde venoit d'estre  
posée, ils rencontrent la sen-  
tinelle qui refusans de les lais-  
ser passer, le tuent, & passans  
plus outre trouuent le corps  
de garde, qu'ils veulent for-  
cer pour passer à quoy les ha-



bitans resistoyent, la compa-  
gnie dudit sieur Comte en  
coucha deux ou trois par ter-  
re, & en blessent quelques  
autres iusques au nombre de  
six, le bruit de ceste escarmou-  
che s'espand de plus en plus  
aux parroisses voisines, les  
Gentils-hommes & les Com-  
munes y accourent, vne mul-  
titude d'hommes en armes se  
trouuent à l'entour d'eux, qui  
les empeschent d'euader, &  
voyans qu'il n'estoit possible  
d'esquiner de leurs mains, fōt  
quelque resistance, mais de  
toute la troupe qu'ils estoiet  
ne s'en sauuerent que trois:  
tous les autres furent pris &  
arrestez prisonniers, & con-

duits en la Citadelle de Gre-  
noble, entre lesquelles sont  
lesdits sieurs Comte de la Suse  
& le Vicomte de Machaur  
blessés, dont a esté dressé pro-  
cez verbal, enuoyé au Roy  
pour sçauoir sa volonté & son  
commandement sur ce qui en  
seroit à faire.

**F I N.**

## PERMISSION.

**I**L est permis à Pierre Roccollet  
Libraire à Paris, faire Imprimer  
un petit liure intitulé: *La prise du*  
*Comte de la Suse, faisant leuees en Dau-*  
*phiné pour secourir Montauban*, Et  
deffences à tous Libraires, Impri-  
meurs, Colporteurs & autres de  
l'Imprimer, ny vendre d'autre  
impression, à peine de confiscation  
& de cinquante liures d'amende.  
Fait à Paris le 5. Novembre 1621.

